

FILED

JDA

IN THE TRADITIONAL RIGHTS COURT  
MAJURO ATOLL  
REPUBLIC OF THE MARSHALL ISLANDS

Toshiko Nuka )  
Plaintiff )  
 )  
vs. )  
 )  
Rema Morelik et al )  
Defendants )  
\_\_\_\_\_ )

Civil Action No. 2006-078

LEMNAK

Ilo April 3, 2006, High Court Civil Action #2005-078 ear jino ronjake eo an iman court kein ruo an High Court im Traditional Rights Court ilo juon ien joint hearing ilo courthouse eo ilo Uliga, Majuro, Republic of the Marshall Islands, im jemlok ilo April 7, 2006. Ro rar jijet ilo panel eo an Court in an Manit rar Honorable Botlang Loek, Associate Judge im Honorable Kalem Jinnuna, Associate Judge im Honorable Berson Joseph, Chief Judge eo an Traditional Rights Court. Honorable Richard Hickson, Associate Justice eo an High Court, ej judge eo ear tel konono ko ilo case in.

Abonono eo ilo case in ej kin jilu ene-jidrik ko, Toen Ralik, Kieo, im Ennylebegan (Carlos) ko rej bed ilo ailing in Kwajalein Atoll, Republic of the Marshall Islands. Case in ear itok non court kein jimor non air jerbale im bukot mejlan abonono eo ikotan party kein. Case in ebwe an kabokbok kinke ejelet mantin jolet maron ko ad ion bwidrej. Aoleb armij rein ilo case in rej **nejin im jibun alab Bwilele**, einwot an plaintiff exhibit 1b kemlet kake. Im menin konono eo elab ilo case in ej kin won eo ekkar bwe en kabjer **maron eo an dri jermal** ilo jikin kein konono kaki.

Court in an manit ej kio kwalok lemnak eo an ikijien issue in, bedbed wot iumin mantin Majol. Elab an court in kile aurok eo an manit im ijo kunan non bukot mejlan ta eo ejimwe im emon-tata non party kein ilo ejelok kalijeklok, jeb ak kakkure jabdrewot ro ilo case in.

I. **ABONONO EO ILO CASE IN:**

a) Kajitok No. 1 einwot kar jakemantak: Won eo ekkar im jimwe bwe en kabjer maron eo an dri jermal ilo ene kein jilu ilo case in?

b) Uwak eo non kajitok No. 1: Mrs. Toshiko Nuka

c) Komlele ko ilo tu-kadu ikijien un ko ekkar non Uwak eo non Kajitok No. 1 ej bedbed ioer:

1. Court in an manit ej tomak bwe plaintiff exhibit 1b ebwe an kemleleiki e make. Ekkar non plaintiff exhibit 1b, Toshiko ej tor-in-botoktok jen Nuka jemen, im jen Bwilele jiman. **Kera Nuka**, likao eo eritto jen Toshiko Nuka, ear bok title in dri jermal ilo jikin kein konono kaki ilo ejjelok nurboktak jen ro ilo menmenbwij in. Ta eo ebwid bwe Toshiko en jab wonlintak in bok jikin likao eo jein? Court in an manit emwij an kwalok ijo ej ilok ie-lok. Bareinwot, court in ej nebar plaintiff eo kin juon menmenbwij eo elab an alikar im erre. Jouij im etale!!

2. Nan in kamol ko an Irojlablab Anjua Loeak: Court in elab an kile Iroj Anjua einwot juon witness eo elab an jela ean-im-rak ilo wawen an uwaki kajitok ko lilok none. Wawen in ej make kalikar ke elab an melele kin bwidrej ko an, elabtata armij ro an. Ejjelok an uwota ilo an uwak jabdrewot kajitok ko lilok none jen counselor ro, ak court kein bareinwot. Rar kajitok

ibben, “Rainin won eo kwoj kile im ekkar bwe en kabjer maron eo an dri jermal ikotan defendant im plaintiff eo.” Ear uwak, “Toshiko Nuka.” Uwak eo an Iroj Anjua kin Toshiko elab an oktak jen melele ko iloan exhibit ko jilu an defendant im Iroj Anjua ear jaini (signed).

Kottoabar eo elab an defendant rein ej bwe ren bareinwot **bar bok** title eo an dri jermal. Aet, lemnak in enaj kar jimwe im emon elane ear ejjelok nejin emmaan. Jemelele im jela bwe **manit ej ukot manit**. Elane enaj ettor im **lot bwij eo**, inem ro nejin botoktok renaj bok jikier. Ak elane enaj **lot botoktok**, bwij eo enaj bok jikier. Jen kautiej manit in emon.

3. Certification of Traditional Success:

a) AL- one - Juon kalimur im webben jen Irojlablab Anjua Loeak bwe Jilo Lantir en bar kabjer maron eo an dri jermal ilo jikin kein konono kaki ilo case in. Elab ad melele kin ta kottoabar eo an exhibit in. Muktata, jejela bwe aoleb exhibit ko jilu, AL-one non AL-three rej jab an Irojlablab Anjua Loeak. Ilo nan in uwak ko an non councils ro ak court kein, ear ba, "Iar signed, kinke rar ba in signed." Ear signed kinke Toshiko Nuka ilo mantin marshall rej nejin lellabrein, Jilo Lantir im Rema Morelik.. Court in ejjelok an berre ke Iroj Anjua Loeak elab an melele kin mantin jolet ko ad ion bwidrej. *Bwe taunin ke Iroj im jela11* Inem etoke ear signed? Iroj Anjua ejela ta eo ej komone, *ear loran ibweb*, dredren ke emwij an kwalok won eo ej dri jermal. Elab an Iroj Anjua Loeak kautiej lellab rein, einwot ke rej jet ian alab ro an. Elab ad melele menin, bwe elane ear jab kautiej ir, inem *eban kar signed*.

Kio kin menin, court in an manit ej watok bwe aoleb exhibit ko jilu an defendant, **AL-one, AL-two, AL-three**, ejjelok kitier kin wot un kein:

- a) Rar jab kebak ro jet ilo family eo im bok air lemnak. Rar kojermal kajur.
- b) Rar lemnak bwe ir wot rej nukin Bwilele.
- c) Rar kojermal Irojlablab Anjua Loeak non konan ko air. Wawen in elab an kaburo-mojmoj. Ilo mol, ren kar muktata kebak Iroj Anjua im lale ewi an lemnak ikijien won eo ej bok maron eo an dri jermal ian Toshiko Nuka im Yota Nysta kab Rema Morelik.

Nan in kamol ko an defendant elab air alikar einwot air ba bwe elikin wot an Rema

Morelik drauk mejen ilo kilan mij, inem Yota Nysta enaj bok jikin im alab eo ekal. Lemnak in ej air wot, im ejab an court in. Ak kinke ej wor wot ro nejin botoktok remour rainin, inem Yota Nysta eban erom juon dri jermal non ene-jidrik kein konono kaki ilo case in. Jej aikuij kautiej ro *nejin botoktok* bwe rej dri jolet bareinwot. Mani ej ukot mani! Melelen, elane enaj lot bwij eo, inem ro nejin emmaan renaj jolet maron. Ak elane enaj lot botoktok, inem bwij eo enaj jolet maron.

II. Etan im Address ko an Dri Kamol ro an Dri Abonono:

1. Rinta Morelik - Hostile witness Honolulu, Hawaii
2. Toshiko Nuka - Ebeye, Kwajalein Atoll
3. Willie Mwekto - Demon Town, Majuro Atoll

III. Etan im Address ko an Dri Kamol ro an Dri Jumae Abonono:

1. Kotak Loeak - Enedrik Weto, Majuro Atoll
2. Irojlablab Anjua Loeak - Lojkar Weto, Majuro Atoll
3. Rinta Morelik - Honolulu, Hawaii

IV. 1. Kein Kamol ko Emwij Air Drelontok einwot Kein Kamol ilo Case in:

1. Kein Kamol an Dri Abonon No. 1 - 8.
2. Kein Kamol an Dri Jumae Abonono No. 1 -

V. Wawen ko jet im Panel in ej lemnak kaki ke elab air aurok:

1. Ren lale im kautiej dron. *Rej aoleb dri jolet jen Alab Bwilele*
2. Ren jab ankwonak. *Ijo am, am - ijo an, an!*
3. Ren kebak im *eoron ennan* iben iroj ro air ien otemje!

KIO, KIN MENIN, ekkar non mantin Marshall im bedbed wot ion melele ko ilo case in, court in ej bar juon alen kwalok an lemnak einwot in bwe:

a) Toshiko Nuka ej armij eo ekkar im jejjet rainin bwe en kabjer *MARON EO AN DRI JERBAL* ilo Tolen Ralik, Ennylebegan (Carlos) im Kea (Kiio) ilo Kwajalein. Marshall Islands.

b) Party kein ilo case in rej *jim-jan jim-jatin*. Ren meloklok ta eo **emeo** ikotaer im jino air kautiej dron kin juon yokwe eo ejjelok uwan im jab jolok dron.

Date: 7/14/06




BERSON JOSEPH  
Chief Judge, Traditional Rights Court  
Republic of the Marshall Islands

Date: 7/14/06



BOTLANG LOEAK  
Associate Judge, Traditional Rights Court  
Republic of the Marshall Islands

Date: 7/14/06



KAJEMEN JINUNA  
Associate Judge, Traditional Rights Court  
Republic of the Marshall Islands